



Komunikadu Imprensa

20 Juñu 2013

Kazu violénsia doméstika kontinua julga iha Tribunál Distritál Dili

Iha 19 Juñu 2013 Tribunál Distritál Díli kontinua halo julgamentu ba kazu ho natureza violénsia doméstika ne'ebé komete husi arguidu TO hasoru nia kónjuje JC. Kazu ne'e akontese iha Aldeia Boa Morena, Vera-Cruz, Distritu Díli.

Ministériu Públiku akuza katak iha 22 Novembru 2010, arguidu lori besi ka sock motor nian baku dala tolu iha lezada nia ain parte karuk to tohar, inklui baku tan nia liman bainhira lezada halo defeza kauza to ran sulin no moras.

Kazu ne'e tanba lezada sai husi uma iha lorokraik to dader mak foin fila ba uma ho razaun ne'ebé la klaru. Aleinde ne'e lezada nia aman dehan ba arguidu katak lezada sai ho mane seluk ho motor.

"JSMP kestiona sé artigu 145 kona-ba ofensa ba integridade fízika simples mak apropriadu iha kazu ne'e, tanba krime ne'ebé arguidu komete ne'e seriu. JSMP husu ba Ministériu Públiku wainhira formula akuzasaun tenke refléta gravidade husi krime ne'ebé mak arguidu komete," dehan Diretór ezekutivu JSMP Luis de Oliveira Sampaio.

Ministériu Públiku akuza arguidu kontra artigu 145 kona-ba ofensa ba integridade fízika simples Kódigu Penál konjuga ho artigu 35 Lei Kontra Violénsia Doméstika.

Ministériu Públiku husu ba tribunál atu suspende arguidu nune'e iha futuru arguidu bele hadia nia hahalok. Aleinde ne'e parte defeza konkorda ho alegasaun Ministériu Públiku nian.

Kazu ne'e rejista iha tribunál ho Númeru Prosesu: 107/2013/TDD. Julgamentu prezide husi Dr. Jose Maria de Araujo, Ministériu Públiku. Representa husi Dr. Jose Landim no arguidu hetan defeza husi Dr. Juvinal Yanes Freitas nu'udar Defensória Estagiadu. Ofisiál Justisa ne'ebé responsavel iha prosesu ne'e mak Sr. Valente Felipe.

Leitura sentensa sei kontinua iha 10 Jullu, 2013 oras tuku 3 lorokraik.

Atu hetan informasaun kle'an liután favór kontaktu:

Luis de Oliveira Sampaio
Diretór Ezekutivu JSMP

Diresaun e-mail: luis@jsmp.minihub.org
info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPtl